

新編  
樊山

批公判

讀精華

東溪州堂  
原本

新編樊山批牘精華目錄

恩施樊增祥嘉父

卷二十五

批商州楊牧宜瀚稟

批渭南縣詳

批署岐山縣徐令普稟

批清澗縣稟

批鄠縣陳令稟

批商州楊牧稟

批漢中府恩守稟

批延安府劉守等公稟

定遠廳詳

批潼關釐局吳令稟

批澄城縣命婦田李氏控詞

批雒南縣丁令稟

批雒南縣自理詞訟月報清冊

批潼關釐局吳令庚稟

批鳳翔傳守稟

批雒南縣丁令禧瀚詳

批西安府詳

批雒南縣丁令稟

批扶風縣自理詞訟月報清冊

批褒城縣鈕令稟

批安塞縣曾令朝康稟

批渭南縣詳

新樊山批牘精華卷二十五目錄終

新編樊山批牘精華卷二十五

恩施樊增祥嘉父

批商州楊牧宜瀚稟

稟單均悉。該署牧循聲電采。迴越恒常。而觀過知仁。斷案常有失厚之處。本司批牘。亦時有若嘲若諷之詞。今閱許祚仁上控方世才一案。稟詞反復詳盡。清冰直繩。奸狀冤情。披豁紙上。末後處斷公允。實獲我心。查祚仁堂弟許祚考。始淫方世才之妹。被世才就姦所網縛。祚仁輒敢糾衆勒釋。以致祚考色膽愈大。不惟姦世才之妹。並姦世才之女。此案因祚考潛與方引女續姦。世才夫婦憤激往捉。卽於姦所用剪刀。截斃。因顧惜顏面。棄屍不報。祚仁乃藉屍圖訛。捏控謀財害命。及經劉令訊明斷結。仍敢再三上控。迨本司批州提訊。方引女行至中途。墜崖身死。夫幼女何知。被祚考誘脅成姦。久爲父母痛恨。今以祚仁誣控之故。就質州堂。目視其祖若父若母。因殺姦之故。破家傾產。而身不得脫。其死也。殆愧憤所激。有意投崖。而非由於失足也。明矣。審若是。則祚仁以謀殺誣人。量減一等爲絞候。而引女羞憤自盡。罪坐所由。祚仁尤百喙莫辭。來稟請將祚仁從九職銜褫革。笞四百板。鎖繫五年。尙未盡滿吾意。查

方世才姦所殺姦。有功無罪。引女一死。尤足盡洗其門戶之羞。而因許祚仁狡健誣訛。女亡家破。彼應重辦。此可矜憐。所有世才父子夫婦。及見證方記娃等。在州在縣。一切訟費川資。應令許祚仁持出。引女愚幼失身。包羞隕命。所有棺殮齋醮之費。亦應祚仁持出。仰將從九執照追繳。勒令一共出錢五百串。交方世才具領。如十日不交。卽將該棍徒從重笞責一千板。鎖繫鐵杆石墩十五年。免其交錢。如能遵斷交錢。則如該署牧原斷完結可也。劉令賡年。從前亦有偏謬之處。且山陽上控甚多。蓄意調一北山簡缺。近來屢經訪察。該令實係有心要好。判斷一切。較前大有進益。方當褒獎。豈忍苛求。此案問得甚好。仰卽轉飭該令。好自爲之。將來不止於百里也。至慮許祚仁再赴撫轅刁告。則詳明撫憲立案。尤爲周密。仍候臬司批示。繳。

批渭南縣詳

絕業爭繼之案。往往而有。世風益薄。貪財產而悖倫常者。幾若視爲固然。此等毫無天性之人。雖歷引古人孝弟之事。譬說百端。何足發其深省。惟有痛打一法。使彼受剝膚之災。差免蔓訟之累。此案原告李振愷。當其長兄故絕之時。尙未生子。業憑親族。以二門之子爲長門後。雖得遺業。然葬祭之費。皆二門任之。振愷突於數年以後。

因生子而起奪業之心。竟以佔據控其二兄。意在婪產奪繼。該令於訊明後。不打一板。疾給兄弟翕和故事一本。令其熟讀自悟。此等辦法。乃兩漢循吏之所爲。施之今日。微嫌迂緩。不但不能感振愷之心。轉致延訟不休。其二兄更加受累。豈非仁於奸民而反累及良民乎。今振愷於上控批訊以後。數月不回縣投審。應卽照例銷案。一面飭咸長二縣。在於省城各店鋪。嚴拏李振愷到案。代該縣痛加笞責。以儆刁誣。此繳。

### 批安塞縣曾令朝康稟

該令是北山最爲出色之員。實政實心。本司知之稔矣。此稟所陳。無一虛語。具見苦心化導。務實而不務名。行之稍久。亦必日有起色。視彼甫經下車。黑白不知。朔南莫辨。卽妄談興利除弊者。正如元凱之視渾敦。麒麟之視瘦狗。其度量之相越。豈不遠哉。繳。

### 批渭南縣詳

此案吳桂興欠潘同合銅錢四串。久假不歸。同合於本年七月。復往索討。桂興妻谷氏。助夫斥說。致同合有如肯陪睡。卽不索錢之言。當經全樹林勸解各散。谷氏卽於

是夜吞烟身死。經該令審訊明確。潘同合照因他事與婦女口角。彼此詈罵。婦女一聞穢罵。氣忿輕生者。杖一百。流三千里。例擬杖一百。流三千里。谷氏照例准其旌表等因。具詳前來。查鄉民粗野無知。每逢彼此忿爭。其出言村俗惡薄。有百倍於陪睡之言者。况桂興欠錢四串。屢討不還。其理本屈。此次夫婦齊聲抗債。致激同合之怒。發言輕薄。尙不至於穢惡不堪。是同合激而出此。本無調戲之心。一勸卽散。更無逼迫之勢。吳谷氏本可不死。而竟至於死。或者因貧難度。早存蟬蛻之思。或者借此爲題。別有銜碑之處。皆未可知也。以情與例相參而論。同合索債之理長。谷氏賴債之理短。因抗償斥說。而始反脣相稽。是衅起於抗償之人。而輕薄非無因而至。與例載由他事與婦女彼此口角者。似屬不合。且陪睡一言。褻而不至於穢。與例載一聞穢語云云。亦屬不合。以情理論。同合之罪。滿徒卽足蔽辜。杖流未免太重。仰再依律準情。從輕科斷。至於死者人之所難。然谷氏過於輕生。非愚卽戇。若再請旌表。是導民輕生也。應毋庸議。此批由司詳請督撫憲核示。並移臬司知照。繳。

批署岐山縣徐令普稟

接閱來牘。深爲惦念。該令居岐。隱然西面一屏障也。自去臘以來。鳳翔守令。真有東

井五星之慶。今尹守調權首郡。周令左右。本司鳳屬。派銷積鱗。緝拏逸匪。主張新政。佈置冬防。繫惟執事。是賴不圖。偶嬰日疾。請假就醫。昨者尹守自扶風還郡。有致周令書。道及執事。日疾頗劇。欲求善地。量移本司。稟商撫憲。憲意以爲屢見岐山。稟函密字。長箋。流美精勁。日疾當不爲累。遂罷前議。今閱此稟。發言懇到。信非虛語。若執事還省。鄙人誠所樂聞。比者仲錫將歸。子摺淶之。深資匡益。再得執事惠然。豈非并難具美。第念足下鵠原之痛。吾黨同悲。本係積累之身。雖繁劇屢膺。而宿逋仍在。更以元方鉅萬之累。歸併一人。尙須接濟嫂姪。月分鶴俸。在任猶難摒擋。假歸何以支持。昨聞子摺云。足下之疾。蓋焦灼所致。去年逸犯李猪娃等。久未弋獲。賢令尹費財動氣。百計追求。而本司不明。猶復屢相督促。興言及此。嘆悔何如。昔王晉卿耳聾。東坡咒之云。限三日疾去。不去當割我耳。已而晉卿果愈。坡詩所謂且喜兩家俱平善也。今亦願君目速愈。不愈卽移於吾目。勿使賢令乞退。得批已後。好自將息。况銷鹽已順理成章。匪但三名獲二。卽使猪娃漏網。於執事何與哉。在岐逾年。官民之間。如家人父子。辦公養疾。知不相妨。語云一動不如一靜。鄙意仍欲足下勿動。必欲歸者。可另示數行。當與撫憲謀之。此繳。

批清澗縣稟

現當力行新政之際。政務處責令各省各州縣。將所辦學堂工藝巡警諸要政。造具表冊。咨送備查。各屬遵札造資。已復不少。茲閱來稟。知係縣公親筆。意在鋪陳治績。炫露才華。據云遇有家庭控爭各案。其半多係因財。務使略明大義。稍知天性之恩。公餘遍歷各鄉。卽勸以安分敦倫。此時黎庶漸次共聞共見。又云清邑每遇稟辦要政。輒患赤拳空張。豈僅款所無出哉。又云興建小學堂。不免因陋就簡。乃今二月間。當卽考選聰明穎異之生童二十人。諸生功課。旬日送署一次。親加校閱。又云間有殷實巨紳。竟爾素慣瑟縮。屢經剴勸。迄無首倡應之者。幾使束手。又云清邑常患缺糞。因查有東洋造糞之法頗多。擇其用牛馬畜骨醱酵法。最爲便宜。此法行之。亦免臭骨亂拋等語。語曰人苦不自知。天下不通人。專好舞弄筆墨。該令卽其一也。以後再以此等不通不雅之語言形諸稟牘。定予撤參。仰綏德州轉飭恪遵。並不准其胡亂校閱課卷。繳。

批鄂縣陳令稟

閱稟不禁慨然。據稱該縣管押劉三卽劉成娃一名。自光緒二十四年十月被押。歷

今七年之久。問其情罪。則因劉三之胞姪騾娃。因行竊被鄉老查問。致毆張創李恒貞二人先後身死。當獲犯訊供之始。固於劉三無與也。嗣因屍親張根香與劉三有隙。控以叔姪共毆。及委員查訊得實。根香自認挾嫌誣控。具有悔結存案。而委員方革令稟稱。兇犯騾娃。究係劉三胞姪。請暫行管押。俟定案後再予開釋。旋經劉前令將騾娃兩次招審。犯供翻異。堅稱李恒貞係王世有毆傷。復經前署鄂縣吳革令稟俟緝獲王世有至日。再行質訊。自茲以後。騾娃在監。城娃在押。世有緝獲無期。騾娃定案無日。而無罪被押之成娃。亦遂永無出廳之望矣。當方革令委訊之初。業已質明騾娃毆人成娃並未在場幫毆。並取有原告悔結。乃該革令以究係胞姪一言。效胥吏舞文之慣技。自以爲必如此方爲認真。公事必如此方爲熟悉例牌。而不知繫累無辜。造孽非淺。再查劉騾娃到案之初。犯竊行兇已經供認。招審翻異。乃囚徒避就之常。前升司發縣另招。亦係照例之事。而吳革令妄希意旨。遽請別緝逃犯王世有到案。再行質訊。該革令曩在讞局。名隸五鬼之中。專欲駁人之案。顯己之能。心術之壞。關中罕比。此案經兩革令後先舞弄。劉三遂幾幾瘐斃。而彼兩令者。卒以居心險狠。並遭彈劾。而吳更下獄追贓。雖云果報無差。而劉三卒無緣自脫。今幸賢令尹

關心民命。繙閱六年以前之陳案。察悉其冤。稟請開釋前來。吾意劉成娃者。必其先積有過惡。故適遇方吳兩革令。幾永墮於黑暗地獄也。又必具有善心。故於官經五任以後。卒得賢父母爲之振拔也。書曰。罪人不孥。天下罪犯大辟。無連坐父兄者。況於諸父乎。仰於奉批之日。卽將劉三卽劉成娃登時釋放。以豁沈寃。並免其取保。該令能如此用心。富貴壽考未有艾也。仍詳記三大功。俾同寅以劉令雲霖爲法。而以五鬼爲戒。吾陝之民。庶有孚乎。此繳。

批商州楊牧稟

據稟張敬業誣控李瑞臨一案。委曲詳盡。繪景繪聲。眞公牘中射雕手也。據稱敬業不孝不弟。始唆繼母逐其過繼之兄。繼因誣陷瑞臨。並忍於誣其繼母。此案瑞臨與敬業之父張凌霄。及李克昌。各出資本銀四百兩。夥開德盛新過載行。瑞臨獨領號事。迄今三十三年。獲利十餘萬金。截至光緒二十五年止。敬業一家。已分利銀二萬七千餘兩。乃因父死母慈之故。浪蕩胡爲。旣誣控不遂。乃敢在省城擅奪該行代客完釐之銀六千兩。迨經咸甯追究。已耗去四千餘金。均由瑞臨彌補。此次復在商州結訟。該署牧灼知奸僞。敬業遂來省妄誣。似此無良無恥猪狗不若之徒。難斷容恕。

迹其所爲。唆母逐兄罪一。蟻母辱宗罪二。浪蕩敗家罪三。忘恩反噬罪四。搶奪釐金罪五。任舉一端。皆堪棄市。仰咸長兩縣。在於省城各店鋪。嚴拏張敬業到案。押發商州。交新任胡署牧。查照楊令原斷。安速結報。俟具結後。卽將敬業監照追奪。用大鍊巨石。嚴加鎖繫。不拘年限。須其母若兄。及李瑞臨到案具保。再爲稟請酌奪責放。仍移楊令知照。繳。

批漢中府恩守稟

單稟及鈔件均閱悉。貴府可謂愛人以德矣。黃令由中書改外。頗能讀書。文筆有足觀者。初試爲令。志在廉勤。方今人才難得。上司每假借之。至於例案。乃專門之學。書生始仕。茫未有知。祇宜虛以受人。豈可剛愎自用。前者黃令因褒城招解之案。爲貴府所駁。遽行通稟請示。其詞氣披猖傲狠。自是本司深不謂然。幕僚擬批已微示箴儆矣。夫書生本未讀律看詳。情罪未協。犯供又復翻異。經本府駁回另審。事理之常。何至如此發瘋動氣。試思皋陶乃刑名之祖。皋曰殺。堯曰宥。若使皋陶亦如該令任性。幾何不呵堯罵舜耶。貴府所駁。顛撲不破。而屬吏敢於徑稟層台。攻訐本府。使府縣一般見識。豈不貽人笑柄。乃披閱來稟。詞氣安和。意切憐才。絕非求勝。另摺開呈。

稟批一通。纚纚千言。披卻導線。以例案言。是刑名老手。卽以文章言。亦是公牘作家。兩兩相形。黃令原稟。不但硬紮死打。全失情法之平。卽論努目撐眉。亦豈有詩書之氣耶。天下年少人。聰明人。往往誤於自是二字。黃令若從此虛心。所至尙未可量。若一味以規爲瑱。則與自暴自棄無異矣。來牘立言忠厚。發於貴府之至誠。至於律意精通。深得幕賓之勦助。東南盡美。佩服深之。愚弟樊增祥手復。

批延安府劉守等公稟

據公稟已故陝西候補知州張桂森之妻華氏曾氏各守節三十餘年。例得旌表。公同具稟。造冊加結。籲請轉詳。請奏前來。查張故牧籍隸壽州。隨宦隴上。華氏未加笄。適髮賊遽陷。本州鶴唳。遙傳紫玉有成。煙之耗。鴛盟別締。青琴續中斷之絃。迨曾已于歸。荆布慕古來之德曜。而華猶未死。紅闥有海外之蘇仙。雖匹嫡有戒。著於春秋。而二女同居。徵於易象。邢與尹氏皆夫人而相泣也。姬以叔隗爲內子。而已下之。何期月不長圓。天乎遽隕。當送死養生之大事。釵笄無忝於鬚眉。完生男育女之苦心。彼此無分於嫡庶。論德則已無子而善視他人子。華固無私。論才則內夫家而不外父母家。曾尤多智。綜計撫孤守節三十三年。孤子成人。兩嫠壽考。昔也春蘭秋

菊同牽交讓之枝。而雪柏霜筠。並著凌寒之操。憫茲節義。宜予褒揚。仰候轉詳請旌。繳冊結存。送冊中乙巳俱訛爲己巳須改。

批定遠廳詳

來詳敘述此案前後情節。不甚圓穩。兇犯張洗耀。因其故父厚孫薄子。將該犯自置之產。勒分四成。與其胞姪張碧綠。從此伯姪不和。去臘碧綠移居大莊。子欲將分得老屋租與外人。洗耀夫妻向阻。碧綠面罵世父世母。洗耀氣忿。遂賄囑李得法等五人。將碧綠打死。三月十一日五更。得法等各執鐵木各器。前赴碧綠家中。洗耀在家守候。移時得法等走回。聲稱碧綠已死。洗耀給錢四十串各散。次日洗耀夫婦同往收殮。胞姪尸已入棺。適遇碧綠僱工丁麻子走來查問。洗耀盡吐其實。丁麻子不依報官獲案。洗耀以謀殺擬絞。查碧綠少孤。經洗耀撫育成丁。恃祖愛而橫分伯產。便宜自佔。鞠育全忘。猶敢詈罵犯尊。稱欲糾人毆打。設洗耀此時投明族衆。立即撻之致死。以尊屬而斃犯上之卑幼。罪亦甚微。何必出於謀殺。卽以謀殺而論。洗耀夤夜遣人往刺。至多兩三人足矣。何必延請五人之多。洗耀年逾六十。有子三人。都已分居。則壯大可想。洗耀欲行此事。何以不謀之於親子。而謀之於外人。得法等黑夜潛

來貪賄也。非與碧綠有仇也。乘其睡臥。一刀足以了事。何必刀矛扁杖。橫施毒手。致有十餘傷之多。洗耀賄人斃姪。其僱工張文緒。僅給包穀斗餘。李得法等。則許錢百串。文緒何竟貿然聽命。凡謀殺人者。先須算計停妥。然後前往下手。碧綠家有僱工。洗耀豈不知之。幸而是夜巧遇丁麻子回家。萬一丁麻子與碧綠同在一屋。彼五人者。將併丁麻子而殺之耶。抑嚇禁丁麻。使勿聲張耶。碧綠死矣。刺客都散矣。洗耀此時正當佯爲不知。坐待丁麻來報。何以老夫妻迫不可待。卽於次早同往收殮。族隣一人不覺。棺木如此現成。正欲蓋棺。而丁麻適至。甫經查問。洗耀立卽盡情傾吐。天下謀殺人者。竟如是之無用耶。此案底細。不能懸揣。但觀來詳。事理種種支離。仰再提同犯證人等。悉心研鞫。另擬招解。勿稍率忽。總之洗耀身爲伯父。撫育孤姪成人。分其弱半之資財。報以惡聲之詈罵。卒令六十老翁。以謀殺擬抵。此事之萬分不平者也。仰照指駁各節。另具副詳。逐層聲覆。倘再毫無道理。官撤任而幕驅逐。本司皆優爲之。此繳。

批潼關釐局吳令稟

趙甌北詩云。閨媛如有私。時或恐人知。妓女雖改行。見客仍笑嬉。所以劉士安轉運。

兼度支。筭庫必用士。不使吏爲之繳。

批澄城縣命婦田李氏控詞

外姑控壻。其壻則校官也。身爲多士之師。而忍於負心盜財。背師欺寡。殊出情理之外。據稱該氏故夫田寶岐。以卽用進士。解組歸田。王重熙束脩不行。得爲升堂高弟。又以其子妻之。前後寄頓金銀衣飾麥糧。數在千金以上。重熙窺爾夫故。昧抗不還等語。查王重熙。鄆州廩貢。何以負笈澄城。家有同仁質庫。何能昧人銀物。爾夫故并非乏嗣。何以銀錢衣物。不交諸子。而交諸壻。重熙之妻。是否該氏親生。爾壻昧良。爾女何亦忘其父母。爾旣執據興訟。何以控澄城不理。控盤屋又不理。而崔令甘心貼銀二十五兩。爲汝盤川。所呈均不可信。惟查女壻負心。世所恒有。近來滿城如柏。將舅家產業寶器。盜竊淨盡。自市一官赴蜀。幾陷其內弟於饑寒。本司不平久矣。茲閱來呈。豈得不問。仰西安府尹守。轉飭盤屋崔署令。迅將此案情節。詳細稟覆。以本司揣之。壻開典當。岳寄資財。事或不虛。惟田李氏。是否田寶岐嫡妻。寶岐故後。曾否另醮寶岐之子。現在何處。是否不肖。皆宜切實查明申覆。如果王重熙真有吞昧情事。本司必嚴劾押追。俾一千欺心盜財。如四川知縣如柏者。有所儆懼。如果該氏夫亡。

別嫁。此時窮極無賴。受唆訛人。亦卽據實直陳。本司無成見也。詞發速繳。再查來詞。用有大同縣印。田寶岐去官之日。預用許多空白稟牘。供其身後妻子打官司之用。可發一噓。

### 批雒南縣丁令稟

稟摺並悉。辦學堂先須籌經費。旣得經費。然後可以定辦法。州縣不能治事。而能做官者。恃有幕友書辦故也。惟學堂一事。斷非刑錢朋友。門印書差。所能牽傀儡使行。替暗啞說話也。是以官非通人。其學堂稟牘。決無一中肯語。本司於州縣學堂事。從不排斥。何也。明知其不學。而又責其不通。是猶責傀儡之不能行。誚暗啞之不能言也。每得通人一牘。不禁心開目明。如獲星鳳。今之定新法者。皆欲使天下無人不學。其愚真不可及。試問天下之官。皆能辦學堂之人乎。不能辦。而強之使辦。敷衍紕繆。有何益乎。然則如何而可。應之曰。事由漸進。道在觀摩。遇有通人稟牘章程。亟登報章。以供衆覽。使不學之官。皆有所取法。庶中小蒙養各學堂。可以逐漸推廣。欲知取法安在。則秦報所登商州郃陽鄜州綏德臨潼永壽諸學程。雖因地制宜。有大小深淺繁簡之不同。要皆切實可行。而今之雒南又其一也。讀之欣快。繳。